

Visoki predstavnik i specijalni predstavnik EU pozdravio moguće pokretanje NATO-ovog MAP-a



Visoki predstavnik i specijalni predstavnik EU Valentin Inzko pozdravio je odluku ministara vanjskih poslova NATO saveza na sastanku u Talinu da pozovu Bosnu i Hercegovinu da pokrene Akcioni plan za članstvo (MAP).

“Ovo je veoma važna garancija sigurnosti za obične građane u BiH”, rekao je visoki predstavnik i specijalni predstavnik EU Inzko, naglasivši da je u više navrata tokom proteklih mjeseci, u Briselu i Sarajevu, prezentirao ovu procjenu Sjevernoatlantskom vijeću.

Ministri vanjskih poslova NATO-a i dalje su zabrinuti činjenicom da pitanje nepokretne vojne imovine još uvijek nije riješeno, te su na samitu u Talinu ovlastili Sjevernoatlantsko vijeće da prihvati prvi Godišnji nacionalni program Bosne i Hercegovine (osnovni mehanizam za provođenje Akcionog plana za članstvo) tek nakon što se nepokretna vojna imovina, identificirana kao neophodna za buduće vojne svrhe, zvanično registrira kao državna imovina BiH kojom će raspolagati Ministarstvo odbrane BiH.

“Zaključci ministara vanjskih poslova NATO-a u potpunosti su u skladu sa uslovima koje je utvrdio Upravni odbor Vijeća za provedbu mira za odluku o zatvaranju OHR-a i tranziciju u angažman pod vodstvom EU”, rekao je danas visoki predstavnik i specijalni predstavnik EU Inzko. Drugi cilj u takozvanom “5+2”

programu Upravnog odbora Vijeća za provedbu mira je iznalaženje prihvatljivog i održivog rješenja za pitanje vojne imovine.

Iako treba pozdraviti nedavni napredak u rješavanju pitanja pokretne vojne imovine, još uvijek se čeka na dogovor o nepokretnoj imovini.

Visoki predstavnik i specijalni predstavnik EU pozvao je vlasti u BiH da iskoriste odluku iz Talina kako bi stvorili politički zamah koji bi rezultirao zaključenjem sporazuma o nepokretnoj vojnoj imovini, u skladu sa Zakonom o odbrani BiH, kako bi država Bosna i Hercegovina postala vlasnik vojne imovine neophodne za buduće odbrambene svrhe.

“Ako BiH u septembru želi krenuti u realizaciju MAP-a zajedno sa Crnom Gorom, političko rukovodstvo BiH mora postići dogovor prije izbora”, rekao je Inzko. “Oni imaju šansu da pokažu glasačima da mogu uraditi nešto pozitivno”, dodao je.